

langabezia tasa altuen ondorioz. Administrazio publikoetako gastua hondoratuko da defizit publikoa gutxitzeko egitasmoaren helburua bete ahal izateko. Inbertsioa ere txikiagoa izango da, ingurunea hoberantz noiz egingo duen eta finantzazioa lortzeko malgutasun handiagoa noiz gauzatu den esperoan. Barne eskariaren ahultasuneko testuinguru horretan, inportazioak ere gutxituko dira eta esportazioek konpentsatuko dute, baina neurri batean bakarrik, narriadura orokorra.

HIRUHILABETEKAKO AURREIKUSPENAK ESPAINIARENTZAT (2012ko martxoa)

Urte arteko aldakuntza tasak

	2012.I	2012.II	2012.III	2012.IV	2012	2013
BPG	-0,2	-0,9	-1,2	-1,1	-0,8	-0,4
Kontsumo pribatua	-1,1	-1,8	-2,0	-1,0	-1,5	0,0
Kontsumo publikoa	-6,5	-7,5	-8,3	-10,0	-8,1	-8,1
Kap. finkoaren eraketa gordina	-9,4	-10,8	-12,1	-9,6	-10,5	-4,8
- Inbertsioa ekipamenduan	1,2	0,4	0,1	1,2	0,7	2,3
- Inbertsioa landutako aktiboetan	-6,0	-6,3	-7,9	1,0	-4,9	2,0
- Inbertsioa eraikuntzan	-10,7	-12,3	-12,5	-10,0	-11,4	-5,4
Barne eskaria	-4,2	-5,0	-5,5	-4,6	-4,8	-2,6
Esportazioak	3,6	2,8	2,4	2,5	2,8	4,8
Inportazioak	-9,2	-10,3	-10,9	-8,5	-9,7	-1,0

Iturria: CEPREDE.

Jarduera adarrei dagokienez, 2012. urtean industriak portaera hobea izango duela aurreikusten da eta eraikuntzak eta zerbitzuek nozituko dute sakontasun handiagoz jardueraren beherakada. Ekonomia jardueraren narriadurak lanpostu garbien galera ekarriko du berriro. Funcasek %2,7an kokatu du galera hori 2012rako eta %1,1ean, berriz, 2013rako. Beherakada horrek adierazten du 460.000 lanpostu galduko direla 2012an eta beste 180.000 hurrengo urtean. Langabezia tasari dagokionez, 2012an %23,7ra igoko dela eta 2013an, berriz, %24,2ra kalkulatu da.

EAErako aurreikuspenak

Eusko Jaurlaritzako Ekonomia eta Plangintza Zuzendaritzak EAEko ekonomiaren taula makroekonomikoan zehazten diren aurreikuspenak 2012rako eta 2013ko lehen seihilekorako

berrikusi ditu. Eguneraketa horretan, beherantz zuzendu dira 2012rako hazkunde aurreikuspenak. Aldakuntza tasa berriak %-1,3ko uzkurdua islatzen du EAeko ekonomiarentzat aurreten. Hiruhilekoka adierazita, atzeraldian sartuko da eta emaitza txarrean aurtengo bigarren hiruhilekokoan gertatuko dela aurreikusten da. 2012ko azken seihilekokoan susperraldi txiki bat hasiko da eta 2013ko bigarren hiruhilekokoan, aurreikusi den azkena baita, hazkunde ahula eta zerotik hurbila jasoko da.

EAE-KO EKONOMIARENTZAKO AURREIKUSPENAK (2012ko martxoa)

Urte arteko aldakuntza tasak	2012.I	2012.II	2012.III	2012.IV	2012	2013.I	2013.II
BPG	-0,8	-1,6	-1,4	-1,2	-1,3	-0,5	0,1
Azken kontsumoa	-0,8	-1,1	-0,7	-0,5	-0,8	-0,2	0,1
Kontsumo pribatua	0,0	-0,4	-0,4	-0,4	-0,3	-0,2	0,1
Kontsumo publikoa	-3,5	-3,6	-2,0	-0,8	-2,5	-0,1	0,0
Kapital eraketa gordina	-3,2	-4,0	-3,9	-3,8	-3,7	-3,3	-2,7
Barne eskariaren ekarpena	-1,3	-1,8	-1,5	-1,3	-1,5	-0,8	-0,4
Kanpo saldoaren ekarpena	0,5	0,2	0,1	0,1	0,2	0,2	0,5
Lehen arloa	-10,5	-23,8	-24,7	-19,7	-19,7	-16,0	-9,3
Industria	-0,9	-2,1	-2,5	-1,9	-1,9	-0,8	0,5
Eraikuntza	-6,0	-6,7	-6,9	-5,2	-6,2	-4,1	-3,4
Zerbitzuak	-0,2	-0,5	-0,2	-0,2	-0,3	0,1	0,4
Balio erantsi gordina	-0,9	-1,5	-1,5	-1,2	-1,3	-0,6	0,1
Ekoizkinen g. zerga garbiak	-0,2	-0,6	0,0	0,0	-0,2	0,2	0,6
BPGren deflatoea	1,3	1,3	1,1	1,0	1,2	1,1	1,2
Enplegua	-1,8	-2,0	-1,7	-1,7	-1,8	-1,3	-1,0
Langabezia tasa	11,7	12,1	12,2	12,2	12,1	12,3	12,3


Iturria: Ekonomia eta Plangintza Zuzendaritza.

2012. urtean zehar, barne eskariak ahultasun handia erakutsiko du eta, horren ondorioz, ezin izango du ekarpen positiborik egin EAeko barne produktu gordinari. Ahultasun hori aurreikusi den epealdi osora luzatuko da. Aitzitik, kanpo eskariak ekarpen positiboa egingo du, baina oso txikia izango da eta mugatuta egongo da nazioarteko ingurunea, bereziki Espainian, ezegokia izango delako. Inportazioak gutxituko dira, barne eskariaren beherakadarengatik, eta esportazioak haziko dira, baina gero eta gutxiago.

Barne eskaria osatzen duten osagai guztiek behera egingo dute. Familien gastua kontsumoan %0,3aren inguruan murriztuko da 2012. urtean. Kontsumitzaileek aurreikuspen ezkorak hauteman dituzte nazioarteko ekonomiaren bilakaeraz eta, bereziki, lan merkatuaren egoeraz, enplegua galduko dela eta langabezia tasa igoko dela pentsatzen dutelako. Horren ondorioz, EAeko familiek portaera zuhurra erakutsiko dute eta kontsumoa ezin izango da hazi. Administrazio publikoek, berriz, gastua oso nabarmen murriztuko dute kontu publikoak onbideratze aldera. Eszenategi makroekonomiko berriaren estimazioen arabera, kontsumo publikoaren murrizketa %2,5era iritsiko da. Merkatuetan nabaritzen den mesfidantza enpresariei ere eragin die eta horrek, beste oztopo batzuekin batera, hala nola bankuetatik finantzazioa lortzeko zailtasuna, inbertsioaren beherakada ekarriko du.

EAeko BPGren eta enpleguaren bilakaera

Urte arteko aldakuntza tasak



Iturria: Eustat eta Ekonomia eta Plangintza Zuzendaritza.

Eskaintzari dagokionez, ekoizpen arlo guztiek ekarpen negatiboa egingo diote balio erantsi gordinaren hazkundera 2012. urtean. 2013ko lehen seihilekoa arte itxaron beharko da suspertzeko zantzuak ikusteko eta hazkunde positiboko norabidea berreskuratzeko. Industriak 2012an izango duen narriadura %1,9ko jaitsieran estimatu da. Espainiako eta Euroguneko ekonomien egoera txarra industriaren jardura makalaraziko duen lasta bat da. Eraikuntzak eskariaren eta eskaintzaren arteko desoreka zuzentzen jarraituko du eta ez da hazkunde positiborik aurreikusten epealdi osoan. 2012. urterako aldakuntza tasa %-6,0an kokatuko da. Etxegintzaz gain, obra zibilak ere behera egingo du, aurrekontuak murrizteko ezarri diren neurrien ondorioz. Zerbitzuek ere 2012an atzeraldi leuna pairatuko duen beste sektore bat da

eta 2013ko lehen sei hilekoan hasiko da berriro suspertzen. Datozen hiruhilekoetarako espero diren kontsumitzaileen kontsumo ezak eta gastu publiko txikiak hazkunde erritmoa gutxituko dute eta gehikuntza tasa negatiboak jasoko dira. Hirugarren sektorearen batez besteko hazkundea 2012. urtean %-0,3an estimatu da.

Aurreikusi den epealdi osorako ez da lanpostu garbien sorrerarik espero, alderantzik baizik. 2012. urtean eta 2013ko lehen sei hilekoan, enpleguaren aldakuntza tasak %-1,8an eta %-1,2an kokatuko dira, hurrenez hurren. Horrek esan nahi du 17.000 lanpostu inguru galduko direla 2012an. Batez besteko langabezia tasa %12,1era iritsiko da 2012an eta %12,3ra, berriz, 2013ko lehen sei hilekoan.

Datozen hiruhilekoetarako aurreikusi den eta Eusko Jaurlaritzako Ekonomia eta Plangintza Zuzendaritzak EAeko ekonomiarako prestatu duen taula makroekonomikoak hainbat suposamendu hartu ditu kontuan nazioarteko ingurunekeo ekonomien etorkizuneko bilakaeraz, epe laburrean prezioek izango duten mailaz, euroak dolarraren aldean izango duen truke tasaz eta Europako Banku Zentralak aurreikuspen epealdi honetan ezarriko dituen interes tasez.

Europako Banku Zentralak epe laburrean ezarriko duen politikaz, analisigileek uste dute datozen hilekoetan ez duela aldaketarik egingo interes tasetan, eremu horretako hazkunde ekonomikoa bultzatu behar delako. Europako ekonomiak baldintza zailak ditu aurrean, aurrekontuko herstura egitasmoekin, langabeziaren etengabeko igoerarekin eta kredituen eskaintza txikiarekin. Dena dela, EBZk inflazioa zaintzen jarraitzen du eta etengabe aztertzen du Euroguneko ekonomiaren egoera inflazioaren balizko igoera batekin. Arrisku hori, bereziki, petrolioaren nazioarteko salneurriaren igoetatik etor daiteke.

Oso litekeena da Europako gaur eguneko egoeraren ondorioz EBZk interes tasak maila apaletan uztea. Horri gehitzen bazaizkio Europako diruak bizi dituen arazoak, garbi geratzen da estatubatuar dolarrek garesti jarraituko duela euroaren aldean datozen hiruhilekoetan. Aurreikusitako epealdi osoan euroak dolarraren aldean balioa galduko duela espero da eta 2012ko batez bestean euroa 1,30 dolarren truke salduko da. 2013an, berriz, euroaren kotizazioa 1,28 dolarretara iritsiko da.

Aurreikuspen horiek oinarrizko eszenategi batean oinarritzen dira, baina arrisku eta ziurgabetasun handiak daude, beraz ekonomien hazkunde tasak bizkortu edo galgatu daiteke. Europa izango da giltza aurrerapen erritmoa ezartzeko orduan. Beste aldetik, Txinak ustez pairatuko duen moteltzea munduko ekonomia osorako kezka iturria da. Oinarrizko eszenategiaren aurreikuspenak aldatu ditzakeen beste faktore bat petrolioaren salneurria da.

Eskualde esportatzaileetan bizi den ezegonkortasun politikoa arrisku bat da herrialde inportatzaileetarako petrolioaren horniduran. Aitzitik, ekonomia eragileen konfiantzak, bereziki kontsumitzaileenak, hobera egingo balu litekeena da ekonomiaren hazkunde igurikimenak gorantz zuzendu behar izatea.